



# Consultaziun

tar la

**revisiun parziala da la lescha da taglia e da la  
lescha davart las taglias communalas e davart  
las taglias da baselgia**

concernent las

**taglias sin l'ierta e sin donaziuns**

## Cuntegn

<b>1</b>	<b>Situaziun da partenza.....</b>	<b>3</b>
1.1	Situaziun giuridica actuala.....	3
1.2	Intervenziun parlamentara.....	3
<b>2</b>	<b>Finamira da la novaziun .....</b>	<b>4</b>
<b>3</b>	<b>Principis da la regulaziun .....</b>	<b>4</b>
3.1	Suveranidad fiscala e stgalim da la lescha .....	4
3.2	Obligaziun da pajar taglia e liberaziun da taglia.....	4
3.3	Proceduras ch'effectueschan taglias .....	5
3.4	Tariffas da taglia.....	5
3.5	Execuziun da la taglia sin l'ierta e sin donaziuns .....	6
3.6	Indemisaziun per l'execuziun.....	7
3.7	Realisaziun en las vischnancas.....	7
<b>4</b>	<b>Consequenzas finanzialas e personalas.....</b>	<b>8</b>
4.1	Entradas fiscalas.....	8
4.2	Consequenzas personalas.....	8
<b>5</b>	<b>Ulteriur proceder e plan da terminis .....</b>	<b>9</b>
<b>6</b>	<b>Commentari tar las singulas disposiziuns .....</b>	<b>9</b>
6.1	Lescha chantunala da taglia.....	9
6.2	Lescha davart las taglias communalas e davart las taglias da baselgia .....	11

## 1 Situaziun da partenza

### 1.1 Situaziun giuridica actuala

Las taglias sin l'ierta pon vegnir incassadas sco taglia sin il relasch u sco taglia sin la part d'ierta. La taglia sin il relasch cumpiglia l'entir relasch e – per quant ch'el pervegn a persunas obligadas da pajar taglia – vegn el suttamess sco totalitad a la taglia. Tar la taglia sin la part d'ierta vegn il singul ertavel suttamess a la taglia per la part d'ierta che vegn assegnada ad el.

En il dretg vertent exista tar il chantun ina taglia sin il relasch ed ina taglia sin donaziuns, entant che las vischnancas pon incassar ina taglia sin la part d'ierta ed ina taglia sin donaziuns. L'administraziun chantunala da taglia (**AChT**) eruescha il relasch imputabel respectivamain la donaziun imputabla ed impona la taglia chantunala. La vischnanca surpiglia las valurs dal chantun ed impona la taglia communal. En il chantun èn oz liberads da l'obligaziun da pajar taglia ils conjugals, ils uffants ed ils pèrs en concubinad. En las vischnancas èn liberads stringentamain da la taglia ils conjugals ed ils uffants ed en circa dus terzs da las vischnancas ils geniturs ed ils pèrs en concubinad. Ils figliasters ed ils uffants confidads han il medem status sco ils agens uffants.

La taglia chantunala sin il relasch e sin donaziuns vegn incassada en moda unitara cun ina tariffa da 10 pertschient. Las tariffas da taglia communalas sin l'ierta e sin donaziuns dependan dal grad da parentella. Ellas dastgan importar – tenor la lescha davart las taglias communalas e davart las taglias da baselgia (**LTCTB**) – per il tschep dals geniturs e per ils pèrs en concubinad maximalmain 5 pertschient e per ils ulteriurs pajataglias maximalmain 25 pertschient. Bleras vischnancas han in'atgna tariffa da taglia per retschaviders che appartegnan al tschep dals tats (aug, onda, cusrin, cusrina e.u.v.). Entaifer quest rom fixeschan las vischnancas la tariffa da taglia en la lescha communal da taglia.

### 1.2 Intervenziun parlamentara

En la sessiun d'avust 2015 è vegnida inoltrada l'incumbensa Kunz (Cuir) concernent l'aboliziun da la taglia sin l'ierta. La regenza ha constatà en sia resposta ch'il chantun na possa betg sa prestar las perditas da taglia pervia da l'annulaziun da la taglia sin l'ierta. Ma ella è sa declerada pronta d'acceptar l'incumbensa en ina concepziun alternativa, pli miaivla, en la quala il chantun midass ad ina taglia sin la part d'ierta. Questa midada vegniss concepida uschia, ch'ils geniturs fissan liberads da la taglia sin l'ierta, ch'il tschep dals geniturs (fragliuns, nevs e nezzas e.u.v.) fissan suttamess ad ina taxaziun reducida da maximalmain 5 pertschient e ch'ils ulteriurs beneficiaris fissan suttamess ad ina tala d'almain 10 pertschient. Ultra da quai avess questa midada per consequenza ch'i resultass ina regulaziun unitara en il dretg chantunal ed ina taxaziun tras la AChT. Las vischnancas pudessan mo pli normar las tariffas da taglia en il rom da la regulaziun en la LTCTB<sup>1</sup>. Il

---

<sup>1</sup> [Incumbensa Kunz concernent l'aboliziun da la taglia chantunala sin l'ierta](#)

cussegl grond ha acceptà l'intervenziun en la concepziun proponida da la regenza cun 63 cunter 35 vuschs<sup>2</sup>.

## **2 Finamira da la novaziun**

Cun midar da la taglia sin il relasch a la taglia sin la part d'ierta han ins differentas finamiras. En emprima lingia vulan ins cuntanscher che las tariffas da la taglia sin l'ierta e sin donaziuns dependian dal grad da parentella cun il testader respectivamain cun il donatur e ch'ellas vegnian reducidas per il tschep dals geniturs. Quai era gia l'intenziun da la dumonda Stiffler (Tavau Plaz) da l'onn 2010 concernent las taglias sin l'ierta tranter fragliuns. Quella giada era la regenza sa declera pronta d'examinar la dumonda en ina proxima revisiun da la lescha da taglia<sup>3</sup>.

Ultra da quai poi vegnir profità da la midada ad ina taglia chantunala sin la part d'ierta per simplifitgar essenzialmain l'execuziun tras l'unificaziun da la legislaziun e da l'incassament da taglia.

## **3 Principis da la regulaziun**

### **3.1 Suveranidad fiscala e stgalim da la lescha**

Il chantun e las vischnancas mantegnan lur suveranidad fiscala per l'incassament da la taglia sin l'ierta e sin donaziuns. Il chantun mida ad ina taglia sin la part d'ierta; la taglia sin donaziuns resta da princip tala e quala. Las vischnancas èn libras d'incassar ina taglia sin l'ierta e sin donaziuns. Ma ellas na pon betg incassar mo ina taglia sin l'ierta u mo ina taglia sin donaziuns. Per tractar differentamain las assegnaziuns tranter vivs u per causa da mort en la taglia na datti nagina motivaziun objectiva persvadenta. En la lescha da taglia ed en la lescha davart las taglias communalas e davart las taglias da baselgia duai vegnir duvrada la noziun da la taglias sin l'ierta e sin donaziuns, perquai ch'ella è pli usitada. La concepziun sco taglia sin la part d'ierta sa mussa alura en la regulaziun concreta.

La taglia sin l'ierta e sin donaziuns dal chantun e da las vischnancas vegn reglada en la lescha chantunala da (LT). Las vischnancas pon decider, sch'ellas vulan incassar ina taglia sin l'ierta e sin donaziuns tenor las disposiziuns dal dretg chantunal. Ellas èn vinavant cumpetentas per fixar las tariffas da taglia en il rom da las prescripziuns da la LTCTB. Las vischnancas èn er cumpetentas per il relasch da taglia e per las amortisaziuns administrativas.

### **3.2 Obligaziun da pajar taglia e liberaziun da taglia**

In'obligaziun da pajar taglia exista en il chantun ed en la vischnanca, sch'il testader u il donatur aveva ses domicil en la vischnanca u sch'in bain immobigliar è stà l'object dal transferiment da facultad.

---

<sup>2</sup> [Protocol dal cussegl grond, 9 da december 2015, suentermezdi](#)

<sup>3</sup> [Dumonda Stiffler concernent las taglias sin l'ierta tranter fragliuns](#)

Il subject da taglia da la taglia sin l'ierta e sin donaziuns èn da princip ils retschaviders dals augments da facultad e da las assegnaziuns. Suttamess a la taglia èn pia ils ertavels, ils legataris ed ils donataris, nun ch'els sajan exceptads da l'imposiziun da taglia.

Sco en il dretg vertent duain ils conjugals ed ils uffants esser liberads da la taglia. Ils partenaris registrads han il medem status sco ils conjugals en tut il dretg fiscal (art. 1b LT) ed èn qua er liberads da pagar taglia. Plinavant duai la liberaziun chantunala da taglia actuala dals pèrs en concubinat vegnir extendida sin las vischnancas. En il dretg vertent pon las vischnancas incassar ina taglia sin l'ierta e sin donaziuns da maximalmain 5 pertschient; però circa dus terzs da las vischnancas han normà ina liberaziun da taglia.

Da nov duain er ils geniturs vegnir liberads da l'obligaziun da pagar taglia. In'imposiziun da taglia da quests cas savens tragics, en ils quals in uffant mora avant ils geniturs, na vegn insumma betg chapida en la pratica. Vitiers vegni che la maioritad da las vischnancas na suttametta gia oz betg ils geniturs a la taglia e ch'ina regulaziun armonisada duai adina s'orientar a la maioritad. La liberaziun da taglia dals geniturs po chaschunar fatschentas da guntgida cun reglar ina donaziun tranter fragliuns sur ils geniturs. Questas constituziuns da dretgs abusivas pon vegnir cumbattidas cun l'instrument da guntgir la taglia, sche la donaziun als geniturs e la donaziun successiva dals geniturs ad in uffant/fragliun vegnan realisadas entaifer tschintg onns. La donaziun vegn alura suttamessa a la taglia sco sch'ella fiss capitada tranter fragliuns.

Ils figliasters ed ils uffants confidads duain avair en moda cumplexsiva il medem status sco ils agens uffants. Quai ha per consequenza ch'er ils padrasters, las madrastras ed ils geniturs da tgira vegnan exceptads da l'imposiziun da taglia e ch'ils figliasters ed ils uffants confidads vegnan attribuids al tschep dals geniturs sco ils agens uffants.

### **3.3 Proceduras ch'effectueschan taglias**

Ils transferiments da facultad suttamess a la taglia e la valitaziun da las valurs da facultad restan per gronda part tals e quals. Tgi che s'enritgescha pervia d'ina ierta, d'in legat u d'ina donaziun, debitescha la taglia sin l'ierta e sin donaziuns.

### **3.4 Tariffas da taglia**

Per concepir las tariffas da taglia vegn normada per il chantun ina tariffa da dus stgalims. Per ils retschaviders dal tschep dals geniturs (fragliuns, nevs, nezzas e.u.v.) vala ina tariffa da taglia pli bassa ch'ils ulteriurs retschaviders obligads da pagar taglia. D'ina tariffa da taglia speziala per retschaviders dal tschep dals tats (aug, onda, cusrin, cusrina e.u.v.) duai vegnir desistì, perquai che qua na poi per regla betg pli vegnir parti d'ina stretga relaziun persunala. Percunter ha circa la mesadad da las vischnancas oz er per il tschep dals tats ina tariffa pli bassa. Questa autonomia fiscala duain las vischnancas pudair mantegnair, er perquai ch'i resultassan – cas cuntrari – per part augments da taglia massivs.

En il chantun duain las tariffas da taglia vegnir fixadas sin 5 e sin 15 pertschient. Uschia vegn distgargià il tschep dals geniturs, ed ils ulteriurs retschaviders vegnan suttamess ad ina taglia in pau pli auta.

Per las vischnancas duain las tariffas maximalas per il tschep dals geniturs vegnir laschadas tar 5 pertschient e per ils ulteriurs retschaviders vegnir reducidas sin 20 pertschient. Las vischnancas pon incassar oz dals ulteriurs retschaviders maximalmain 25 pertschient. Actualmain èn quai mo diesch vischnancas pli pitschnas che profitan da questa libertad d'agir. Cun augmentar la tariffa chantunala e cun reducir la tariffa communal maximala pon ins cuntanscher che tuts dus purtaders da la suveranità pon exaurir il substrat da taglia en circa la medema dimensiun.

Ins sto er considerar che la taglia chantunala sin il relasch dad oz vegn deducida da la basa da calculaziun da la taglia sin la part d'ierta communal, entant che la nova taglia chantunala sin la part d'ierta na po betg pli vegnir deducida. La part d'ierta sutmess a la taglia sin plaun communal s'augmenta pia per la taglia sin il relasch da fin ussa.

Cumparegliaziun tariffas da taglia <sup>4</sup>	oz		nov	
	chantun	vischnanca	chantun	vischnanca
conjugal, uffants	0%	0%	0%	0%
concubin	0%	5%	0%	0%
geniturs	10%	5%	0%	0%
tschep dals geniturs	10%	5%	5%	5%
ulteriurs retschaviders	10%	25%	15%	20%

### 3.5 Execuziun da la taglia sin l'ierta e sin donaziuns

Sch'il chantun e las vischnancas incasseschan ina taglia identica, ston vegnir regladas las competenzas. Per l'ina sto in'execuziun parallela tras il chantun e tras las vischnancas vegnir impedita per motivs da l'economia administrativa e pervia da las grevezzas amministrativas dals pajataglias. Per l'autra stoi vegnir decidì, sch'ina delegaziun a las vischnancas po vegnir resguardada sco raschunaivla pervia dal dumber da cas e pervia da la complexità da la materia.

Cun la liberaziun da taglia dals conjugal e dals uffants sco er da nov dals geniturs e dals pèrs en concubin vegn incassada ina taglia sin l'ierta mo pli en ina pitschna part dals cas da relasch. En l'entir chantun vegnan registrads oz circa 2100 cas da taglia sin il relasch. En circa 1450 cas exista la cuminanza d'ertavels mo da persunas liberadas da l'obligaziun da pagar taglia, uschia ch'i po vegnir desistì d'eruir il relasch sutmess a la taglia. Ils ulteriurs cas ston vegnir elavurads, er sche las retschertgas mussan ch'i na resulta en circa la mesadad da quests cas nagina facultad d'ierta imponibla. Sin basa da quest bass volumen na poi betg vegnir prendì en consideraziun da delegar l'imposiziun a las vischnancas. Ils dumbers da cas fissan bler memia pitschens per pudair obtegnair ina rutina d'imposiziun sufficienta. D'aggiuntar èsi che las taglias sin l'ierta e sin donaziuns dependan fermamain da giudicaments da dretg civil che pretendan savens er scleriments giuridics pli complexs. Las

<sup>4</sup> Per las vischnancas figureschan tariffas maximalas tenor l'art. 21 al. 5 LTCTB

vischnancas fissan surdumandadas cun las dumondas giuridicas per part difficilas e na pudessan – per mancanza dal volumen – betg far avunda experientschas praticas. Gia en il dretg actual vegn erui il relasch suttamess a la taglia tras l'administraziun chantunala da taglia. Per quest motiv duai l'incassament da la taglia vegnir delegà als mauns da l'administraziun chantunala da taglia. Quai ha constatà la regenza gia en la resposta da l'incumbensa Kunz<sup>5</sup> e questa constataziun è restada incontestada en il cussegl grond.

### **3.6 Indemnisaziun per l'execuziun**

La stretga collavuraziun tranter il chantun e las vischnancas en il sector fiscal chaschuna savens ch'in partenari surpiglia ina lavur e vegn indemnisà persuerter da l'auter partenari. Quai vala gia daditg per la taglia sin las entradas e sin la facultad, nua che las vischnancas vegnan indemnisadas actualmain cun circa 7 milliuns francs, e quai è vegnì applitgà uschia ils ultims onns per l'imposiziun da la taglia sin il gudogn tras la vendita da bains immobigliars u per l'incassament da la taglia a la funtauna.

Er per l'imposiziun e per l'incassament da la taglia sin l'ierta e sin donaziuns ston ins prevair ina indemnisaziun da las vischnancas al chantun, e sco per la taglia sin il gudogn tras la vendita da bains immobigliars duai er qua vegnir applitgada ina pauschala pro cas. En quest connex ston vegnir resguardà che la facultad dal relasch va en la gronda part dals cas al conjugal u als uffants libers da taglia. En quests cas resulta mo ina pitschna lavur che na duai betg vegnir messa a quint ulteriuramain. Er en cas da donaziuns duai vegnir desistì d'ina indemnisaziun, perquai che quellas pon vegnir liquidadas en la gronda part dals cas cun pauca lavur. En ils ulteriurs cas duain las vischnancas pagar ina indemnisaziun che vegn fixada cun 100 francs per ertavel. Sch'i èn participads passa tschintg ertavels ad ina ierta, vegnan mess a quint a la vischnanca maximalmain 500 francs. Ils detagls da la regulaziun vegn la regenza a fixar en las disposiziuns executivas tar la legislaziun da taglia.

### **3.7 Realisaziun en las vischnancas**

La taglias sin l'ierta e sin donaziuns èn regladas oz en las leschas communalas da taglia. La midada ad ina regulaziun definitiva en la lescha chantunala da taglia chaschunass ina revisiun da tut las leschas communalas da taglia cun in'approvaziun successiva da la revisiun tras la regenza.

Per obtegnair ina distgargia administrativa vegn proponida qua ina soluziun, tenor la quala las disposiziuns dal dretg chantunal daventan directamain applitgabels en las vischnancas, q.v.d. il dretg chantunal remplazza la regulaziun en la lescha communalala da taglia. Il dretg fiscal che vala en las vischnancas exista alura dal dretg directamain applitgabel plus da las tariffas da taglia normadas en la lescha communalala da taglia existenta. Uschenavant che quellas s'opponan al nov dretg chantunal, quai che po esser il cas tar geniturs u pèrs en concubinad u tar ina tariffa da taglia da passa 20 pertschient, vegnan ellas remplazzadas dal dretg chantunal. Las vischnancas che n'incasseschan oz naginas taglias sin l'ierta e sin donaziuns, mantegnan questa situaziun giuridica, fin ch'ellas daventan activas sin plaun legislativ.

---

<sup>5</sup> cf. annotaziun 1

La regulaziun n'è betg perfetga, perquai che la lescha communal da taglia na preschenta betg pli il dretg effectivmain valaivel. Ma ella ha l'avantatg che las vischnancas n'èn actualmain betg sfurzadas da far ina revisiun da la lescha e ch'ellas pon far las adattaziuns pli tard ensemen cun in'otra revisiun. Tras quai po er la midada proponida vegnir realisada pli svelta en il chantun ed en las vischnancas. Ma las vischnancas èn libras d'eliminar questa mancanza cun adattar svelta la lescha communal da taglia.

## **4 Consequenzas finanzialas e persunalas**

### **4.1 Entradas fiscalas**

Pervia da la liberaziun da taglia dals geniturs en il chantun sco er dals conjugals e dals pèrs en concubinat en bleras vischnancas na dastgassan betg resultar entradas pli pitschnas considerablas. L'administraziun chantunala da taglia valitescha che las entradas pli pitschnas per il chantun – perquai ch'ils geniturs na vegnan betg pli sutmess a la taglia – importian maximalmain 250 000 francs. Areguard las vischnancas na pon actualmain betg vegnir fatgas indicaziuns, damai che bleras vischnancas han gia oz liberaziuns da taglia correspondentas.

La midada dal chantun a la taglia sin la part d'ierta e sin donaziuns cun las liberaziuns da taglia e cun las tariffas da taglia proponidas qua effectueschan en il chantun entradas pli pitschnas da 3,5 fin 4 milliuns francs. Las consequenzas finanzialas en las vischnancas pervia da la reducziun da la tariffa da taglia maximala per ils ulteriurs retschaviders sco er pervia da las liberaziuns da taglia n'èn betg enconuschentas. Eventualas perditas dastgassan dentant vegnir pli che cumpensadas grazia a la basa da calculaziun pli auta pervia da la deducziun mancanta da la taglia sin il relasch.

### **4.2 Consequenzas persunalas**

La taglia sin la part d'ierta chaschuna tant tar l'imposiziun sco er tar l'incassament dapli lavur che la taglia sin il relasch. Per l'ina na po l'imposiziun betg sa restrenscher a la constataziun dal relasch sutmess a la taglia. Quest relasch sto vegnir reparti sin ils singuls ertavels ed imponì en ina procedura separada envers mintga ertavel. Quai po er augmentar il dumber da proceduras da meds legals. Ultra da quai chaschuna l'incassament da las taglias communalas lavur supplementara en il sector da las zavradas da taglia, sche per exempel bains immobigliars vegnan ertads en in'otra vischnanca grischuna ch'il lieu da domicil dal testader. Per l'otra na po l'incassament betg pli vegnir pretendì sco import dal relasch avant la repartiziun da quel. La taglia sin la part d'ierta sto vegnir messa a quint a mintga ertavel e legatari sulet ed acziuns d'incassament ston vegnir exequidas envers mintga singul ertavel.

Cun ina piazza supplementara tar l'imposiziun èsi da quintar per pudair liquidar svelta las lavurs che resultan. Gist en la taglia sin l'ierta duain vegnir evitadas pendenzas d'imposiziun pli lungas, perquai che quellas impedeschan la repartiziun da l'ierta e la terminaziun da la cuminanza d'ertavels.



Da vart da las vischnancas vegni a dar tschertas distgargias che na chaschunan però strusch respargns pli gronds, perquai ch'il dumber da cas imponids oz è simplamain memia pitschen.

## **5 Ulteriur proceder e plan da termins**

Questa procedura da consultaziun dura fin la fin da favrer 2018. Silsunter vegnan evaluadas las posiziuns e giuditgadas las propostas da midadas. La missiva per mauns dal cussegl grond sto vegnir suttamessa a la regenza durant la stad 2018 ed il cussegl grond duai tractar la lescha en la sessiun da december 2018.

Igl è planisà da metter en vigur las midadas per il 1. da schaner 2020. Las vischnancas han pia temp avunda per s'adattar a las cumpetenzas midadas.

## **6 Commentari tar las singulas disposiziuns**

### **6.1 Lescha chantunala da taglia**

L'art. 1 al. 1 regla la midada da la taglia sin il relasch a la taglia sin la part d'ierta. En questa disposiziun vegn duvrada la noziun generala da la taglia sin l'ierta; il caracter d'ina taglia sin la part d'ierta sa mussa en la concepziun concreta da la taglia sin l'ierta.

L'art. 106 enumerescha ils causals fiscals da la taglia sin l'ierta. Il dretg vertent vegn adattà a la taglia sin la part d'ierta, mantegnì dentant essenzialmain areguard il cuntegn. Suttamess a la taglia èn tut ils transferiments da facultad a la mort dal testader. Las assegnaziuns a fundaziuns ed a trusts reconuschids fiscalmain ch'existan e che vegnan fundads da nov vegnan menziunadas expressivamain per stgaffir segirezza giuridica.

L'art. 106a surpiglia il dretg vertent cun ina nova formulaziun. Suttamess a la taglia èn tut ils transferiments da facultad tranter vivs, als quals na s'opponan naginas cuntraprestaziuns correspudentas. Er retratgas anticipadas da l'ierta che vegnan messas a quint ad ina ierta futura èn suttamessas a la taglia sin donaziuns.

Art. 107: Per l'obligaziun da pajar taglias sin l'ierta e sin donaziuns en il chantun u en la vischnanca stoi vegnir sa basà sin il lieu da domicil dal testader u dal donatur. Sco punct da referiment supplementar valan en la relaziun svizra mo pli las immobiglias.

L'art. 107a regla l'obligaziun da pajar taglia per la taglia sin l'ierta e sin donaziuns. Obligà da pajar taglia è en tuts dus cas il beneficiari.

Nova è la regulaziun, tenor la quala il proprietari u ils proprietaris dals dretgs da participaziun èn obligads da pajar taglia en cas d'ina donaziun ad ina societad da chapital u ad in'associaziun, sche las assegnaziuns na vegnan betg fatgas en proporziun dals dretgs da participaziun u tras ina persuna che n'è betg participada a la societad da chapital u a l'associaziun.

En la taglia sin la part d'ierta sto vegnir reglada da nov la dumonda pertutgant l'instituziun d'ertavels secundars, perquai che la dumonda essenziala n'è betg pli, sch'in object da facultad pertutga il relasch dal testader, mabain sche quel va a favur da l'ertavel. La liberaziun da taglia subjectiva da l'ertavel, sco er l'appartegnientscha da

quel al tschep dals geniturs u al tschep dals tats sto vegnir decidida sin fundament da la parentella envers il testader oriund e betg envers l'emprim ertavel.

Art. 107b: Las liberaziuns da taglia ston vegnir regladas en moda unitara per il chantun e per las vischnancas. En il dretg vertent eran ils conjugals, ils uffants, ils figliasters ed ils uffants confidads exceptads da l'imposiziun da taglia en il chantun ed en la vischnanca. En il chantun ed en dus terzs da las vischnancas èn liberads oz subjectivamain plinavant ils pèrs en concubinat ed en medemamain circa dus terzs da las vischnancas ils geniturs. Cun l'unificaziun da las regulaziuns legalas duain ils geniturs ed ils pèrs en concubinat vegnir liberads da nov da la taglia sin l'ierta e sin donaziuns dal chantun e da las vischnancas.

L'art. 109 regla il mument decisiv per la valitaziun da las valurs da facultad.

L'art. 111 al. 1 parta dal fatg che la valur commerciala dals bains immobigliars sa basa sin la stimaziun uffiziala respectivamain vegn registrada da nov da la valitaziun d'immobiglias. Ils pajataglias e l'administraziun da taglia pon dentant pretender ina nova stimaziun, sch'els vulan metter en dumonda la valur stimada. Ils ulteriurs alineas reglan dumondas singulas che na basegnan betg ulteriuras explicaziuns.

L'art. 112 inditgescha ils debits, las grevazzas ed ils custs deducibels.

Art. 113: Las assegnaziuns a las persunas giuridicas libras da taglia na vegnan betg pli regladas qua, mabain en l'art. 107b cun agid da la liberaziun da taglia subjectiva. Il cuntegn da l'alineia 3 na vegn betg midà.

Art. 114: L'import liber da taglia per ils geniturs sto vegnir stritgà, perquai che quels n'èn betg pli suttamess a l'imposiziun da taglia. Las tariffas da taglia discutadas qua survart per il tschep dals geniturs e per ils ulteriurs retschaviders vegnan normadas qua. La regulaziun actuala en l'alineia 4, tenor la quala l'import liber da taglias po vegnir fatg valair mo mintga 5 onns, sch'i dat assegnaziuns da medem gener, vegn abolida. Per l'ina para questa restricziun pauc raschunaivla e per l'autra na la po l'autorità d'imposiziun strusch controllar. Ils imports libers da taglia valan er per las taglias communalas sin l'ierta e sin donaziuns. Las vischnancas na pon betg fixar regulaziuns divergentas.

Art. 114a: La regulaziun speziala per promover la successiun en ina interpresa vegn surpigliada. Areguard l'imposiziun da taglias supplementaras vegni sclerì ch'er l'alienaziun dal manaschi u dals dretgs da participaziun represchenta entaifer 10 onns in causal fiscal da taglia supplementara. Il privilegi da dretg fiscal concedì oriundamain n'è betg pli giustifitgà. L'incassament supplementar da la taglia sin l'ierta e sin donaziuns en la procedura da taglia supplementara vegn reglà da nov en l'alineia 4 per pudair separar las disposiziuns materialas da quellas dal dretg processual.

Art. 115: Cun la midada a la taglia sin la part d'ierta vegn quella incassada tar ils singuls ertavels e betg pli or dal relasch en sia totalità. Per ch'i na giaja betg a perder substrat da taglia cunzunt en cas cun ina relaziun internaziunala, vegnan integradas regulaziuns da responsabladad cumplexivas. Uschia èn responsablas per las taglias sin l'ierta illimitadamain las persunas, a las qualas è affidada la partiziun d'ierta, e solidaricamain ils ertavels cun lur part d'ierta. Per la taglia sin donaziuns è responsabel il donatur.

Art. 165a al. 1 lit. b: L'incassament da las taglias chantunalas e communalas sin l'ierta e sin donaziuns pertutga il champ da cumpetenza da l'administraziun chantunala da taglia. Sco tar tut ils auters geners da taglia sa participeschan las vischnancas als custs d'execuziun. L'indemnisaziun vegn menziunada qua, fixada da princip dentant en l'art. 30 LTCTB e reglada detagliadamain en las disposiziuns executivas da la regenza.

## **6.2 Lescha davart las taglias communalas e davart las taglias da baselgia**

Art. 2: Las vischnancas pon incassar er vinavant ina taglia sin la part d'ierta e sin donaziuns, da nov dentant sa basond sin las disposiziuns legalas da la lescha chantunala da taglia. Quai chaschuna ina regulaziun en l'alineia 2. Er qua vegn utilisada la noziun generala da la taglia sin l'ierta.

Cun la disposiziun facultativa vegni constatà cleramain che la vischnanca po er desister d'incassar la taglia sin l'ierta e sin donaziuns.

L'art. 21 renviescha a las basas legalas en la lescha chantunala da taglia e normescha en l'alineia 5 las tariffas maximalas che la vischnanca po incassar. Il maximum per il tschep dals geniturs resta tal e qual tar 5 pertschient, entant ch'il maximum per ils ulteriurs beneficiaris duai vegnir reduci dad actualmain 25 pertschient a 20 pertschient. Fin a quest maximum pon las vischnancas er introducir ina tariffa per il tschep dals tats; ulteriuras differenziaziuns n'approvass la regenza betg.

Cun midar a la taglia chantunala sin la part d'ierta incasseschan il chantun e las vischnancas las medemas taglias. Quai premetta ch'i duajan er exister pussaivladads sumegliantas d'exaurir la taglia. Da la reducziun sin 20 pertschient èn pertutgadas mo diesch vischnancas ed ins sto partir dal fatg che las entradas pli pitschnas vegnian ad esser minimalas en las vischnancas per gronda part fitg pitschnas. Sche las vischnancas dubitassan questa presumziun, vegnan ellas envidadas da preschentar las cifras correspudentas en lur posiziun, per che la regenza possia alura concluder la regulaziun definitiva per la missiva.

Pertutgant la taglia sin l'ierta e sin donaziuns ston las vischnancas mo pli fixar las tariffas da taglia en las leschas communalas da taglia e definir l'autorità ch'è cumpetenta per il relasch da taglia e per l'amortisaziun administrativa.

L'art. 30 al. 1 cuntegna la basa legala per l'indemnisaziun che las vischnancas pajan al chantun. La regenza regla ils detagls en las disposiziuns executivas.

Ina indemnisaziun duai vegnir incassada mo là, nua che l'assegnaziun va a favur d'ertavels obligads da pajar taglia e pia là, nua ch'i daventa er necessari d'eruir las valurs da facultad. Per ertavel importa questa indemnisaziun 100 francs. A las vischnancas na vegnan dentant betg mess a quint dapli che tschintg ertavels.

L'art. 33a cuntegna la regulaziun transitorica e normescha cunzunt l'applitgablada directa da las novas disposiziuns. Uschia poi vegnir impedi che tut las vischnancas stoppian adattar lur leschas communalas da taglia, damai che las vischnancas n'han nagina libertad d'agir sin plaun legislativ, danor quella da fixar las tariffas da taglia e la cumpetenza da tractar dumondas da relasch da taglia e d'amortisaziuns administrativas.

Cun questa realisaziun sin il stgalim dal chantun po il nov dretg entrar en vigur gia il 1. da schaner 2020.